



《婆羅門子命終愛念不離經》

No. 91 [No. 26(216), No. 125(13.3)]

《佛說婆羅門子命終愛念不離經》

後漢·安息·沙門安世高譯

聞如是：

一時，婆伽婆在舍衛城祇樹給孤獨園。

彼時，有異婆羅門，有一子命終，愛念不離。彼命終，亦不能食，亦不能飲，亦不著衣，亦不塗香，但至塚間而啼泣；彼啼泣，憶念在抱上。於是，彼婆羅門彷徨而行，至世尊所。到已，共世尊面相慰勞；面相慰勞已，彼婆羅門却坐一面已，世尊告曰：

「何以故？汝婆羅門諸根不常定。」

「此，瞿曇！我意根，云何意根當定？我有一子而命終，愛念不離。彼命終，我不能食、不能飲、不著衣、不塗香，我但在家啼泣；啼泣時，憶念在抱上。」

「如是，如是，婆羅門。此，婆羅門！**愛生已，則有憂、感、苦、不樂。**」

「云何？瞿曇！豈當爾『愛生已，當有憂、感、苦、不樂』耶？」

此，瞿曇！愛生已，當有歡喜，愛念。」再三。

世尊告彼婆羅門曰：

「如是，如是，婆羅門。此，婆羅門！愛生已，則有憂、感、啼泣、不樂。」再三。

彼婆羅門白世尊曰：

「云何？瞿曇！豈當爾『愛生已，有憂、感、不樂』耶？」

此，瞿曇！愛生已，但有歡喜、愛念。」

於是，彼婆羅門聞世尊所說，亦不樂、不說非；不樂、不然可已，從坐起，便還。

彼時，祇桓門外有諸戲人共戲。彼婆羅門，遙見祇桓門外有諸戲人共戲；見已，作是念：

“世間聰明者，此是最勝。我寧可所可共沙門瞿曇論者，盡當向彼戲人說之。”

於是，彼婆羅門便至彼諸戲人所；到已，所可共世尊論者，盡向彼戲人說之。如是說已，彼諸戲人報彼婆羅門曰：

「此，婆羅門！豈當爾『愛生已，則有憂、感、苦、不樂』耶？」

此，婆羅門！愛生已，當有歡喜、愛念。」

於是，彼婆羅門作是念：

“此諸戲人語，與我等。”

迴頭已，即便去。

彼所論則廣聞，次第徧王宮。王波斯匿聞之：

「沙門瞿曇作是言：『愛生已，則有憂、感、苦、不樂。』」

王波斯匿聞已，告末利夫人曰：

「此，末利！我聞沙門瞿曇作是言：『愛生已，則有憂、感、苦、不樂。』」

「如是，如是，大王！愛生已，則有苦、憂、感、不樂。」

「此，末利！我聞汝師言，弟子亦爾。」

汝，末利！彼沙門瞿曇是汝師，而今汝作是言：『愛生已，則有憂、感、苦、不樂。』」

「此，大王！聞我所說不信者，便可自往、若遣使。」

於是，王波斯匿告那梨鶯伽婆羅門曰：

「汝，那梨鶯伽！往彼沙門瞿曇所。到已，以我言問訊沙門瞿曇無量，問訊『安隱、輕舉、有力不？』作如是言：

『此，瞿曇！王波斯匿無量問訊安隱、輕舉、有力不？

實沙門瞿曇作是言：愛生已，則有憂、感、苦、不樂耶？』

此，那梨鶯伽！若彼沙門瞿曇作是說，汝當善受持、誦習之。何以故？彼不虛說。」

彼那梨鶯伽婆羅門速受王波斯匿教已，至世尊所。到已，共世尊面相慰勞；面相慰勞已，却坐一面。彼那梨鶯伽婆羅門却坐一面已，白世尊曰：

「此，瞿曇！波斯匿王無量問訊安隱輕舉有力不？實沙門瞿曇作是言：

『愛生已，則有憂感、苦、不樂。』耶？」

「此，那梨鶯伽！我還問汝，隨所有力，當還報之。」

於那梨鶯伽！意云何？

· 或有人，母命終。彼母命終，意狂亂，裸形，不著衣，隨彼遊行，作如是言：

『我不見母！我不見母！』

此，婆羅門！當知之：愛生已，則有憂、感、苦、不樂。

· 如是，父、兄、姊、妹、若婦命終。彼婦命終已，則意狂亂，裸形，不著衣，隨彼遊行，作是言：

『我不見父！』及『婦』。

此，婆羅門！當知此：愛生已，則有憂、感、苦、不樂。

此，婆羅門！

昔有一人，婦還歸家，彼親屬欲奪與他人。彼婦人聞之親屬欲持我與他人；彼婦人聞已，速便走還，還至己夫所；到已，語彼夫曰：

『君當知！我親屬欲持我與他人。君所應為者，今當為之。』

於是，彼人作極利刀，持彼婦人手，還入屋中，作如是言：

『當共同去！當共同去！』

斷彼女人命，亦自斷命。

此，婆羅門！當知此：愛生已，則有憂、感、苦、不樂。」

於是，那梨鶯伽婆羅門聞世尊所說，善受持誦習已，從坐起，繞世尊已，離世尊，還至王波斯匿所。到已，白王波斯匿曰：

「實爾！大王，彼沙門瞿曇作是說：『愛生已，則有憂、感、苦、不樂。』」

於是，王波斯匿告末利夫人曰：

「實爾！末利！彼沙門瞿曇作是說：『愛生已，則有憂、感、苦、不樂。』」

「是故，大王！我還問王，隨所有力，當報之。於大王意云何？愛鞞留羅大將不？」

「此，末利！我愛彼鞞留羅大將。」

「此，大王！彼鞞留羅大將是敗壞、是變異，生苦、憂、感、不樂不？」

「此，末利！鞞留羅大將有敗壞變異，則有憂、感、苦、不樂。」

「此，大王！當以此知之，愛生已，則有憂、感、苦、不樂。」

「於大王意云何？愛賢首大將、愛一奔陀利大象、愛婆夷提女、愛婆沙剎諦隸(夫人)、愛迦尸人民不？」

「此，末利！愛迦尸拘薩羅人民。」

「此，大王！迦尸拘薩羅人民亦是敗壞、有變異，生苦、憂、感、不樂不？」

「此，末利！諸五婬欲自娛樂者，皆因迦尸拘薩羅人民。」

此，末利！迦尸人民敗壞變異者，我命不全，況當不生苦、憂、感、不樂！」

「此，大王！當知此愛生已，則有苦、憂、感、不樂。」

「於大王意云何？今寧慙妾不？」

「此，末利！我亦慙汝。」

「此，大王！妾亦有敗壞、有變異，寧可不生苦、憂、感、不樂耶？」

「汝，末利！敗壞、有變異，我亦當生憂、感、苦、不樂。」

「此，大王！以此當知之，愛生已，則有憂、感、苦、不樂。」

「此，末利！從今日始，彼沙門瞿曇因此事，當為我師，我為弟子。」

此，末利！我今歸彼世尊、法及比丘僧。我於彼世尊持優婆塞，從今日始離於殺，今自歸佛。」如是說。

王波斯匿遙聞世尊所說，歡喜而樂。

《佛說婆羅門子命終愛念不離經》